

māmā o mua. Me te aha, kitea ana te ātaahua, titi rawa ki ngā ngākau o ngā kaiwhakawā. He pērā anō te haka, iti noa ngā ringaringa, whiua ana te kaha ki runga i ngā kupu. Ko te hua, ka hau te reo, mārama ana te rongohia. Arā te tauira ko Rūaumoko, iti noa ngā ringaringa mō te nui o te kupu. Ka riro mā te arero whero me te mata whāitaita o Kahukura e whakaatu te aungarea me te ahi o te riri, kāore mā nui ringaringa, whiu

noa, whiu noa, he oro he ringa, he oro he ringa.

Hāunga a Te Waka Huia me tērā momo kapa, kua taunga rātou ki tēnei taumata, kua mutu noa atu te whakamātau i a koikara, kua ruku kē i te ruku a matauaua. Me kōrero te eke o ngā kapa nō te tuawhenua ki ngā taumata ikeike i roto i ēnei tauwhāinga. Kia eke hoki a Ruatāhuna.....

Ko Aaron Smale te kaitangowhakaahua o ēnei pikitia.

